

Ամեն տուն ուներ ձեռքի երկանաքարեր՝ արկանք թե՛ ցորեն և գարի և թե՛ մանավանդ աղն աղալու համար: Քիչ թե շատ մեծաքանակ հացահատիկ աղալը տեղի էր ունենում ջաղացում՝ ճրղացում: Ջաղացը, Հայկական լեռնաշխարհի այս մասումն էլ իր էական մասերով նույն, տուրբինանման ջրի ուժով աշխատող սարքավորումն էր՝ հորիզոնական պտտվող անիվով: Այս սարքավորումը մշակվել է լեռնաշխարհում, ինչպես և նրան անմիջապես կից երկրներում, շատ վաղեմի ժամանակներից և առանձնապես զարգացած է եղել ուրարտական թագավորության մեջ, ինչպես դրա բարձրագույն կատարելության հասցրած օրինակներն ունենք Հասան-քյոյի՝ Արևմտյան Տիգրիսի ափին բազմահարկ ջաղացներում: Խաղ-ուրարտացիներին այս երկրում հաջորդած հնդերոպացիք մտել են կամ իրենց հին հայրենիքում դեռ հողմաղացին անծանոթ լինելով, կամ եթե ծանոթ են եղել՝ այդ հին սովորությունից վեր են դասել տեղական ձևը և իրենց հողմաղացը բոլորովին անհետ մոռացել, ինչպես շատ նոր ժամանակներում Ռուսաստանից Անդրկովկաս վերաբնակված գյուղացիք թողել են իրենց հայրենի մտրակ-փայտերով⁷⁶ ծեծելը՝ կալսելը և տեղացիներից փոխ են առել կամնով կալսելու եղանակը: Զանգեզուրում հողմաղացին բոլորովին անծանոթ են:

Զանգեզուրի ջաղացները⁷⁷ գետից հանած առվի վրա շատ պրիմիտիվ ձևով կառուցված խղճուկ շենքեր էին, կիսով չափ գետնի մեջ թաղված: Այդպիսիք էին օրինակ՝ Սիսիանի (Սիսավանի), Գեղվա ձորի, ինչպես նույնիսկ Տաթևի ջաղացները: Միայն Գորիսի ձորում նոր կառուցվածներն արդեն ունեին կանոնավոր շարված պատեր և տանիք: Սովորաբար ծածկը հողի հաստ շերտն էր: Այս գավառում չկային այն հույակապ միասնական քարերից կազմված գլանակ-խողովակները, որոնցով պարծենում էր Շիրակում Արթիկի շրջանը:

Ջուրը Զանգեզուրի ջաղացներում անիվը պտտեցնելու համար հոսում է մեջը փոսացրած ամբողջական գերանի կամ իրար մեխած տախտակներից կազմված ճովէրի միջոցով: Մոտեցողն արդեն հեռվից լսում էր շախշախի անընդհատ շխկշխկոցը և ջաղացաքարերի խուլ զրոզրոցը, տեսնում էր դռանը մեկ-մեկ երևացող, ալյուրից սպիտակած ջաղացպանին, բեռներն իջեցնող և բարձող ջրղրցա՛վուրնէրի⁷⁸, ճրղցվօրնէրին՝ պատվիրատուներին, նրանց էշերին, ջորիներին, ձիերին, երբեմն նաև եզներին: Վերջիններին հացահատիկի ջվալներով բարձելը, մանավանդ աղբեջանական բնակչության մեջ, բավական տարածված սովորություն էր: Ջաղացպանին վճարում էին վարձ՝ շահատ— ձիու բեռնից՝ երեք կնիշ, էշի բեռնից՝ երկու կնիշ: Ջաղացները պատկանում էին մասնավոր անհատներին կամ ավելի հաճախ՝ անբաժան ընտանիքներին: Հասարակական ջաղացներ գրեթե չէին հանդիպում:

Ջաղացի առանձին մասերը կրում են փոքր բացառությամբ հայկական անուններ: Հացահատիկի շուռ տված բրգաձև արկղը՝ դօղ՝ դող, տակը հացահատիկ ընդունող մակույկը՝ շրուրփկան⁷⁹, որին միացած է շախշախը: Չախշախը ստորին ծայրով քսվում է ճրղացբարին: Ստորին երկանաքարը տրկաբարն է, վերինը՝ ճրղացբարն է: Պատրաստի ալյուրը թափվում է

⁷⁶ Цепами.

⁷⁷ 1886 թ. Զանգեզուրում կար 255 ջաղաց: Зелинский С. П., նշված աշխ., էջ 122.

⁷⁸ Մեղրու բարբառով:

⁷⁹ Թրբերեն՝ ֆաշկուլ: